

27 - 2 NOV 1990

(Y)

Jangan berkempen secara sulit: PM

ALOR STAR, Khamis — Perdana Menteri, Datuk Seri Dr Mahathir Mohamad, mengingatkan calon yang akan bertanding merebut jawatan penting, termasuk Naib Presiden Umno dalam perhimpunan agung parti itu kali ini, tidak berkempen secara sulit.

Menurutnya, sebagai negara demokrasi pertandingan boleh diadakan, tetapi perlu mengikut cara yang boleh diterima, bukan seperti yang dilakukan oleh 'seseorang' itu ketika hendak merebut jawatan Presiden.

"Apabila dia tidak dapat, dia kecewa dan menyalahkan parti. Saya harap kempen semacam itu tidak akan berlaku lagi," katanya kepada pemberita setibanya di lapangan terbang Kepala Batas di sini, petang ini.

Perdana Menteri berkata demikian ketika mengulas kemasukan ramai calon untuk kerusi Naib Presiden Umno dalam perhimpunan agung Umno bermula 29 November.

Datuk Seri Dr Mahathir dan Datin Seri Dr Siti Hasmah pulang untuk menghadiri kenduri kesyukuran kemenangan Barisan Nasional di Masjid Al-Aqila di Jitra, malam ini.

Ketibaan mereka di lapangan terbang disambut oleh Menteri Besar, Datuk Seri Haji Osman Aroff dan isteri, Timbalan Menteri di Jabatan Perdana Menteri, Datuk Dr Abdul Hamid Othman dan orang kenamaan negeri serta wakil-wakil rakyat.

Semalam, Menteri Luar, Datuk Hassan Omar dan Ketua Menteri Melaka, Tan Sri Abdul Rahim Tamby Chik menyatakan kesediaan mereka untuk bertanding jawatan Naib Presiden Umno di perhimpunan kali ini.

Bagaimanapun, menurut mereka kemasukan itu bergantung kepada kepada jumlah pencalonan daripada bahagian.

Tiga Naib Presiden Umno dijangka mempertahankan kerusi masing-masing ialah Ment-

ri Pendidikan, Datuk Seri Anwar Ibrahim, Ahli Parlimen Kepala Batas, Datuk Abdullah Ahmad Badawi dan Menteri Besar Terengganu, Tan Sri Haji Wan Mokhtar Ahmad.

Dalam perkembangan lain, Perdana Menteri berkata beliau percaya badan-badan tertentu di Amerika dan negara maju lain yang dibantu oleh orang tertentu di negara ini, akan terus berusaha untuk menghalang pertumbuhan ekonomi Malaysia.

"Tahun ini ditolak, tahun depan ada lagilah usaha untuk menghalang pertumbuhan ekonomi negara kita," katanya sebagai mengulas penolakan oleh Mahkamah Daerah Amerika terhadap permohonan oleh kumpulan buruh Amerika dan kumpulan lain bagi menyaman Presiden George Bush dan beberapa anggota kabinet yang didakwa "gagal menguatkuasakan peruntukan hak pekerja dalam Sistem Keutamaan Am (GSP)."